

Երևա տափ

Մակերես՝ 16.25կմ²

Բնակչություն՝ 490

Գյուղ Ապարանի տարածաշրջանում, Ապարան քաղաքից 15 կմ հարավ-արեւելք: Մարզկենտրոնից գտնվում է 21կմ հեռավորության վրա:

Գյուղը հիմնադրվել է 1828-1829 թթ. Արեւմտյան Հայաստանից եկած գաղթականների կողմից եւ ունեցել է Գարապուլագ, Երինճատափ, Ղարաբուլաղ անվանումները: Երևա տափ է վերանվանվել 1946 թ-ին:

Գյուղի տարածքում է կառուցվել ս. Նշան կամ ս. Աստվածածին եկեղեցին: Գյուղից մոտ 2-3 կմ արեւմուտք Աստվածընկալ վանքն է՝ կառուցված V-XIII դարերում: Գյուղը տեղադրված է Արայի լեռան հյուսիս-արեւելյան ստորոտում: Գտնվում է ծովի մակարդակից 1850 մ բարձրության վրա: Կլիման բարեխառն լեռնային է: Ձմեռները տեւական են, ցուրտ, հաստատուն ձնածածկույթով: Ամառները տաք են, համեմատաբար խոնավ: Հուլիսյան միջին ջերմաստիճանը տատանվում է 16-18-ի սահմաններում, հունվարյանը՝ -6,-8-ի սահմաններում: Մթնոլորտային տարեկան տեղումների քանակը 450-600 մմ: Բնական լանդշաֆտները սեւահողային տափաստաններ են:

1873 թ-ին ունեցել է 589, 1897 թ-ին՝ 780, 1939 թ-ին՝ 962, 1959 թ-ին՝ 488, 1979 թ-ին՝ 286 հայ բնակիչ: Համայնքի բնակչությունը կազմում է 542 մարդ, որից 52%տղամարդիկ են, 48%՝ կանայք: Բնակչության մեջ մինչաշխատունակները կազմում են 26%, աշխատունակները՝ 56%, հետաշխատունակները՝ 18%: Ունի դպրոց, գրադարան, բուժկետ, կապի հանգույց: Գյուղն ունի 185 տնտեսություն: Կլիմայի ցամաքայնության հետեւանքով հողահանդակները ոռոգվում են եւ օգտվում են Երևա տափի ջրհան կայանից, որը ջուրը Ապարանի ջրամբարից տեղափոխում է այստեղ:

Համայնքի տնտեսության մասնագիտացման ուղղությունը գյուղատնտեսությունն է:

Գյուղատնտեսական հողահանդակների հիմնական մասն օգտագործվում է որպես վարելահողեր, խոտհարքեր: Զբաղվում են բանջարաբուստանային, հացահատիկային, կերային կուլտուրաների մշակությամբ: Տնամերձ հողակտորներում կան բազմամյա տնկարկներ: Պահուստային հողերը զբաղեցնում են համայնքի մակերեսի մոտ 60%, որոնց մեջ 204 հա կազմում են արոտավայրերը, 37հա՝ վարելահողերը: Զբաղվում են խոշոր եւ մանր եղջերավոր անասնաբուծությամբ: Արդյունաբերություն չունի:

Համայնքի հիմնախնդիրների մեջ կարելուրվում է խմելու եւ ոռոգման ջրի ջրագծերի, գյուղամիջյան ճանապարհների վերանորոգումը :